

մեծ ցաւ զգացի: Յետտեսցայ եւ ճիգ անելով վեր կեցայ: Ոչ ոք չկար: Մտեսցայ պալատի դրան, ոչ ոք չկար:

Կաղալով տուն վերադարձայ:
Լուսարացին ծաղիկներ էին ծախում:

* * *

Հիմա էլ պառկել եմ. ծովը օրօրում է: Նորից, կոյր այն տեսիլքի նման, շօշափում եմ կեանքիս պատերը, դռների առջեւ կանգ առնելով: Ու նոր մի պալատի սանդուխներով պիտի բարձրանամ:

Առաջին անգամ ես ինձ ներկայացայ մահուան առջեւ:

Մեռնողների սենեակները, մեծ այցելութիւնների խորհրդաւոր վայրերը, ճակատագրական ի՛նչ ձեւեր ունին:

Հայրս քանի օրից ի վեր, գլուխը կապած ճերմակ լաթերով, ուրուակալի նման տան մէջ ման էր գալիս: Իօդոֆորմի հոտ էր գալիս, եւ ես վախում էի նրանից: Ջղայնացած, չարացած, փախչում էի պարտէզ, ծառերի վրայ բարձրանում, խակ նոբրը ուրիշների բակը նետում: Հայրս գալիս էր, փնտրում էր ինձ, կտրուած ձայնով կանչում էր եւ յուսահատ, իր տնկած վարդերի առջեւ երկար կանգ էր առնում ու մտածում:

Վերջին այդ երեք օրերը բոլոր իր մանրամասնութիւններով արիւնխս հետ ապրում եմ:

Հայրս ուժեղ մարդ էր, բարի եւ աստուածասէր: Առաւօտները ամենից կանուխ նա էր վեր կենում: Հագնւում էր, քառակուսի մեծ սենեակի անկիւնում երկար աղօթք ասում եւ իջնում պարտէզ: Կէս ժամ ման էր գալիս, մինչեւ որ տնեցիներն եւ ծառաները արթնանան: Վերադառնում էր, պատշգամի մեծ սեղանի առջեւ նստում եւ Աստուածաչնչի հերթական գլուխը կարդում: Ընտանիքը ժողովում էր թէյի, եւ օրը սկսւում էր:

Հայրս սիրում էր պատմել: Տասնվեց տարեկանից մինչեւ յիսուն տարեկան հասակը նա մասնակցած էր բազմաթիւ պատերազմների: Կովկասեան լեռների վրայ, չերքէզների դէմ, լեզգիների դէմ, տաճիկների դէմ: Սուրբ Գէորդ խաչի երեք աստիճանները ունէր, սուր եւ թագաւորի անձամբ ընծայած ոսկէ ժամացոյցը: Գոհ էր:

Սորապէս քրիստոնեայ էր եւ հայ: Ամէն

բան ուուսից էր սպասում. յարգում էր իշխանութիւնը և ցարը: Պատմում են, որ մի օր մեծ եղբորս մասին — ուսանող Պետերբուրգում — ինչ որ բաներ է լսում: Խառնում է քաղաքական գործերին, գեներալ Լազերէվի տան, յեղափոխական մտքեր է յայտնել, Նարոզնիկների հետ կապ ունի... Հայրս, առանց ոչ ոքի բան ասելու, մեկնում է Բետերբուրգ, արտոնութիւն խնդրում Պօղոս եւ Պետրոս բանտերը պատելու, իր գաւկի հետ: Երբ բանտից դուրս են գալիս, եղբորս աչքերի մէջ խիստ նայում է եւ ասում.

— Խելքդ գլուխդ ժողովիր:

Նոյն օրը մեկնում է:

* * *

Երջանի՛կ տարիներ պարսկական սարսափներից յետոյ: Հայերը բոյն էին որոնում: Սրտերը, ծիծեռնակի թեւերի պէս սահում էին տանիքների տակ, «Հայրենիք սրբազան» էին երգում եւ մի քանի տարի յետոյ, Աղամեանի Համլետով հրճւում:

Գլուխը ճերմակ լաթերով կապուած ծերունին պատում էր սենեակից սենեակ, իր տան բոլոր անկիւնների մէջ պրպտելով, երկարօրէն կանգ առնելով ամենաանշան առարկաների առջեւ:

Այս տունը իր պատմութիւնը ունէր:

Պարսիկ Սանի տիրապետութեան օրով հօրս մեծ հայրը շինած էր: Մանկական ականջիս դարի խորքից սարսափի ձայներ էին գալիս եւ հրդեհների բոցեր էին բռնկում:

Շամախին, աղբիւրների եւ վարդենիների հմայիչ այս վայրը, մերթ ընդ մերթ, հրաբխային ցնցումների տակ, փչրում էր իր ողնաշարը ու մէջքը կտրած վայր ընկնում:

Քսանեւ հինգ տարին մի անգամ սարսափը պար էր պարում, տաւարները մայում էին, տուները քանդւում եւ մարդիկ ահ ի բերան խենդութեան ծոցը նետւում:

Մի տարի չէր անցնում, ամէնքը նորից վերադառնում էին, եւ կլկլացող աղբիւրների տակ բիւլբիւլի եւ վարդի երգեր ասում: Հողը մազնիսական էր եւ օդը կախարդ:

Ժամանակներ եղել էին, երբ տարերային քանդիչ ուժերին միացել էր Սանի կռացած սրի արիւնալի վտանգը: Ճանապարհների վրայ, բիւլբիւլի տեղ, ագռաւներ էին թառել: Բուն